

Visoki predstavnik riješio zastoje u donošenju Zakona o unutrašnjim poslovima FBiH

Visoki predstavnik Paddy Ashdown danas je donio Odluku kojom je uskladio tekstove Zakona o unutrašnjim poslovima Federacije Bosne i Hercegovine. Visoki predstavnik je donio ovu Odluku nakon intenzivnih konsultacija sa Vladom FBiH, te uz njenu podršku. Ovaj zakon zamjenjuje postojeći FBiH Zakon o unutrašnjim poslovima uvodeći međunarodne standarde po pitanju poštivanja ljudskih prava, i predstavlja jedan od zahtjeva koji stoje pred BiH u ovom periodu poslije njenog prijema u Vijeće Evrope.

Visoki predstavnik je ovu Odluku donio svjestan činjenice da su Zakon o unutrašnjim poslovima usvojila oba doma Parlamenta FBiH u julu, s tim što je proces usaglašavanja zakona ostao nedovršen. Visoki predstavnik i Vlada FBiH se slažu da implementaciju ovog zakona ne bi trebalo dodatno odlagati. Samim novim Zakonom o unutrašnjim poslovima su definisani organizacija, rukovođenje, kao i nadležnost Ministarstva unutrašnjih poslova FBiH, te je uvedena funkcija direktora policije, profesionalnog policajca koji će rukovoditi policijskim operacijama.

Visoki predstavnik je na početku svog mandata najavio da je uspostavljanje vladavine zakona od izuzetnog značaja za budućnost BiH. Ovaj moderni Zakon o unutrašnjim poslovima osigurava policiji sredstva za borbu protiv terorizma, krijumčarenja i organiziranog kriminala, uz istovremeno poštivanje međunarodnih standarda u oblasti ljudskih prava.